

中庸證釋

序

中庸證釋

亭

第二章

自誠明。謂之性。自明誠。謂之教。誠則明矣。明則誠矣。

謹按此節係今本第二十一章。

宣聖講義

前已將中庸首章講明。而繼首章者。卽述脩道之義。脩道不外盡性。故言道爲明性也。致中和。爲脩道之則。中和卽性情之正。而致之。不外至誠。故至誠爲致中和也。首章旣明道本於性。脩道先致中和。故次章卽以誠明示性道之真。爲教之本。無非爲明道也。亦無非爲成道也。誠字爲儒者脩道至深工夫。至高境。

界。然至深。非奇也。至高。非異也。祇是道之本來。性之本體。大學之至善也。極也。論語之一也。卽首章之中也。莫非其境界也。止至善也。用極也。一貫也。中庸也。莫非其工夫也。故中庸之教。以誠爲始終。能誠則道成。不誠則性失。故誠者。性之本體。道之本來。非由外致之。非自物成之。前章言性道之真。曰中和。此章述成道之則。曰誠明。其義一貫。不可歧視之也。惟性者。不可見。故不可名。不可脩。故不可成。而言成者。有必修之道。言名者。有必見之義。蓋分內外體用言之。以便於教學也。故誠也。中也。至善也。一也。極也。其名也。

致也。執也用也。止也。其成也。無以名之。人將恍惚。無以成之。人將訕謗。故聖人設辭以喻之。立則以示之。皆以便於教學者也。誠既不異於中。何以首章言中。而此言誠。人多疑焉。蓋中者體也。誠兼體用者也。故言性道之真。則中足矣。言脩道成性之事。則必言誠也。故誠之爲成也。言其終也。誠之爲實也。言其始也。實習於脩道之方。實踐乎戒慎之訓。實致其中和之功。而後謂之成矣。故誠者。始於實。終於成。體用皆具。本末一貫者也。知此。然後可以語乎誠。誠爲性道本體。故成道見性。必由至誠。而性道之真。

未有不至誠者。然誠是已成之行。則脩道之極。必至至誠。而至誠卽性。至誠見性。純乎靈明之境。晶然瑩澈。毫無可染。毫無可蔽。是謂性之光明。人而至誠。不蔽於物。不染於塵。性光自充。智慧自足。天下之至明者。不能奪其觀。至聰者。不能劫其聽。是則本來之智。天授之慧。雖神明莫能逾也。是謂成行之聖。天縱之真。而不待乎格物以致其知。而不藉乎脩養以去其蔽。斯卽性之至者。故曰自誠明謂之性。然聖人不世出也。真人多以脩成。性至之誠。或未易得。則由中智以下。易蔽於物欲之私。而奪其本來之智。是則脩養

之要。而中庸之教之切也。教立於聖人。聖人固至性者。誠明之至者。其爲教也。則本其既具之智慧。察夫凡人之性情。知不足以語於誠明。而將失其性道之本。則爲之立其則。示其方。以勉其脩養之功。而致其中和之道。人之率其教也。則能閑其情欲。正其耳目。一其心思。而後以存養之勤。省察之密。不失其本來。以復其天性。是則由脩而成之哲。其所得。端賴乎教者。故曰自明誠謂之教。蓋教者。先使知性情之真。明物欲之害。辨耳目之蔽。然後告以脩養之道。省察之方。日積其行。月累其功。而以致其誠。此卽大學由格

物致知。以誠其意者也。是教之效也。誠本於性。誠明者性之用。明本於教。明誠者教之功。故中庸立教。以致人明誠爲旨。夫誠之明。聖人之所能。而明之誠。學者之所及。以聖人爲教。而衆人師之。則不明者明矣。志聖人之教。而脩聖人之脩。則不誠者誠矣。故教立於聖人。而脩成於衆人。天道也。亦人道也。天生聖人。以明道立教。人奉聖人之教。以明道成行。此道之極則。而天下之大德也。故誠者。始於聖人。終於天下。一聖人推其誠。而天下之人。皆致於誠。教之至也。道之至也。故天不祕道。聖不祕教。忠恕之盡。而仁智之極。

也。此中庸立教之本旨。而率道之真義也。夫誠無不
明。前已言之矣。既明而後誠。則教學之事。明者。明夫
道也。明道而率之全之。以致中和之行。脩養之功也。
故脩道者。爲由明至誠之義。明之爲明。非情識也。非
知覺也。非感憶也。蓋始於格物。中於省察。成於致知。
知至而後謂之明也。人之有知。緣於耳目。動於情感。
因於物欲。此識也。非正知。故明者。不緣耳目之官。不
動情感之念。不徇物好之欲。而靈明通澈。智慧充盈。
精神接於天。意志同於道。然後謂之至明。惟聖人能
之。聖人能明。而以明其不明。此立教之所由。而衆人

得明之所自也。故明有始終。行有初成。明於未明。始也。既明而不惑。終也。因聖人之教。而明脩道之要。初也。循脩道之方。以致至誠之功。成也。故衆人不明。因聖人而明。不誠。因行聖人脩道之教。而誠。其明也。誠也。雖異。其終也。成也。仍同。故誠者必明。明者必誠。由誠之明。由明之誠。聖愚之途。其既誠。既明。無異也。此之謂中庸之教。

誠者。自成也。而道自道也。誠者。物之終始。不誠無物。是故君子誠之爲貴。誠者。非自成己而已也。所以成物也。成己仁也。成物知也。性之德也。合外內之道也。

故時措之宜也。

道也。之道音導。知去聲。

謹按此節係今本第二十五章。

宣聖講義

誠之爲教至矣。而誠者非謂待於外者。必由其天命之性而成。故誠者盡性而已。不知性之體用。則無以致其誠。故誠者必先知中和之本。中爲大本。和爲達道。而立此本。行此道者。則在於誠。故誠之爲誠。無非充其性之德。盡其性之用。全其性之體而已。性者人所同具。而無差別者也。人皆知性之爲性。則誠至矣。故曰誠者自成也。而道自道也。誠以全性。全性以全

其生。生不失性。不惑。則成行也。成行。則成人也。故自成者。言其誠之不待於外。一義也。言其以誠全性全生。二義也。言其能誠而後成人。三義也。非知此旨。不足語於誠。夫誠爲成人之行。卽成行之境。合內外始終而言之也。故一誠而學者畢生行之不窮。外應於事。內善其躬。非致其誠。則人道不立。人道不立。則天道不通。故誠者又不獨自成已也。誠由自成。非聖人爲之言也。本乎道也。道者隨物自見。隨事自在。隨時自存。不因外而動。不因內而靜。不因有而實。不因無而虛。不因大而大。不因小而小。而動靜虛實大小無

不具也。此則道之所以爲道。而明道者所當知也。故道在天。則爲天道。在地。則爲地道。在人。則爲人道。道一也。天高地下。天動地靜。道不異也。而高下自宜。動靜自得。道之見也。故言道者。須知道之自在。不可執物以測道。不可泥事以名道。蓋道自道。非因事物而爲道也。事物因道以成其用耳。故曰道自道也。道之自道。誠之自成。一也。故誠者。順其所成而成者也。是謂性也。性道一本。爲誠者。可不知此義哉。誠之爲誠。聖人所以成教。衆人所以成行。性之所存。道之所在。天不違其德。地不違其用。物不違其則。事不違其理。

時不違其序。故人之於誠。至矣。盡矣。蔑以加矣。是故誠者。爲天地之經。人物之本。雖聖無以加其智。雖神無以喻其功。何況於人物乎。故誠之爲成也。言無不成。無不成。則天地人物。位育盡矣。天地人物。因吾之誠。而皆成也。此卽所謂萬物皆備於我者也。惟誠以成天地人物。故誠者物之所生。所全者也。物生於誠。全於誠。而各得其所焉。故曰誠者物之終始。物之言。凡天地萬物也。外包四極。內概毛髮。莫非物也。惟誠者全之。故不誠者不能也。物生於道。各具其性。同出也。誠者本於道。推其性。乃能始生之。終成之也。其不

誠者。則無以宏道之用。廣性之德。無以生物。卽無以全物也。且不特此也。內無以全性。外無以生身。一身之中。尙且不保。何語於他。故不誠者。不獨不成物也。夫物之爲物。其義精名廣者也。若執其辭。則不明矣。蓋大學始教。以格物爲本。卽此物。物之所包。大則無外。細則無內。凡五官所接。情識所察。思慮所及。皆屬之。惟誠者始明。明則使之各得其所。不誠則不明。不明則蔽。蔽則物我不分。性情莫辨。是非糾紛。邪正倒置。何有物之爲物。道之爲道耶。故誠則生全於物。不誠則皆失其生全。無物云者。不得生全之謂也。一身

之中。無爲生全之主。則人之爲生之道失矣。人無以生。雖生若死。此聖智所悲者也。故君子必貴誠也。夫誠者之本於道。盡於性也。其所成者。全性之德。同道之用也。故道之所成者。成之道之所生者。生之不得。違天道以生成。不得悖性之體用也。故誠者。不獨成己而已。將以成物也。成己爲性道之體。成物爲性道之用。體用俱備。而道成。而性全。有一未得。則非誠也。故誠者之成己。爲成物也。成物亦成己也。己物皆生於道。成己也。成物也。成道而已。故潛脩之日。不怠度世之懷。成行之時。必先立教之事。非爲人也。爲己而

已。非爲己也。爲道而已。道自在於天地。無所外也。人
自生於天地。無所異也。一本所生。一氣所通。而成行
者。不得有人己之殊視也。不得有物我之異觀也。故
天無私覆。地無私載。聖無私教。神無私福。皆本道者
也。人而欲成其行。能不由斯道哉。故成己成物。兩盡
而後誠至。苟獨善其身。自高其道。不知行己未全。而
欲致於誠明。此道之悖行。非聖人也。聖人者。法乎天。
本乎道。盡乎性。仁至義盡者也。故成己仁也。成物智
也。皆性之德也。性之德者。性之自出。由聖人名之也。
曰仁曰智。以其體用而名之。仁爲體。智爲用。卽上節